



### 75 Pelajar UPM Berbakti Kepada Penduduk Lembah Bujang



*Mercu tanda PKM `10 diabadikan di Kampung Pengkalan Bujang.*

**BEDONG, 7 Mei** - Seramai 75 pelajar Universiti Putra Malaysia (UPM) mengadakan aktiviti khidmat masyarakat bersama 52 keluarga Kampung Tradisional Lembah Bujang di sini dari 3 hingga 7 Mei lalu.

Keluarga yang berbeza latar belakang sosioekonomi seperti pesawah, peladang, petani dan nelayan telah menerima anak angkat (pelajar) dari Kolej Tun Dr. Ismail (KTDI) UPM pada hari pertama program.

Pengerusi Pengelola Program Khidmat Masyarakat, Nurul Akmah Ismail berkata program bertemakan 'Keluarga Penyayang, Masyarakat Harmoni' itu juga bertujuan menerapkan nilai murni hidup bermasyarakat pelajar universiti bagi melahirkan barisan pemimpin yang bertanggungjawab pada masa hadapan.

Aktiviti yang dijalankan ialah gotong-royong pembersihan kawasan balai raya dan kubur bersama agensi kerajaan dan penduduk, meneroka kehidupan kawasan Lembah Bujang, mempelajari industri kecil penduduk kampung seperti pembuatan sampan, perusahaan belacan dan bahu, ternakan ikan sangkar, udang dan lembu.

Aktiviti lain ialah persembahan kebudayaan, mendirikan mercu tanda UPM di Kampung Pengkalan Bujang, menyusuri Sungai Merbok dan terlibat dalam gotong-royong kenduri kampung.



*Tinjauan bersama Jabatan Kebajikan Masyarakat dengan warga emas.*

Program lima hari itu mendapat kerjasama Jawatankuasa Kemajuan dan Keselamatan Kampung Persekutuan (JKKKP) Kampung Pengkalan Bujang, Kampung Kuala Segantang Garam, Kampung Segantang Garam, Kampung Sungai Gelam, Kampung Teluk Che Lela, Kampung Ban Merbok, dan Kampung Bendang Dalam.

Pada masa yang sama sebanyak 12 agensi kerajaan turut menjayakan program yang mendapat liputan khas RTM Kedah ketika lawatan ke Agro Pelancongan Chalet Terapung PPK Merbok.

Penyelaras Parlimen dan Ketua UMNO Bahagian Merbok, Dato' Tajul Urus Mat Zain merasmikan program dan pengagihan keluarga angkat serta ceramah bertajuk 'Harapan Baru Rakyat Satu Malaysia' daripada Jabatan Penerangan Kedah.

Mantan Presiden KTDI, Zulhizam Mohamad berkata program itu memberi manfaat kepada peserta selaras dengan moto UPM iaitu 'Berilmu Berbakti'.

"Mahasiswa harus menyemai sikap kasih sayang sesama masyarakat dalam usaha meningkatkan pencapaian akademik agar menjadi insan yang berkualiti dalam hidup," katanya.

Peserta program, Tou Chen San mencadangkan program itu perlu diteruskan dan diperbaiki lagi bagi memantapkan aktiviti-aktiviti untuk pengisian program.



*Aktiviti menyusuri Sungai Merbok.*

"Program ini seronok namun boleh diperbaiki lagi terutama dari segi pengurusan masa aktiviti agar pada masa akan datang ia dapat memberi lebih kebaikan kepada masyarakat dan pelajar," katanya.

**Berita ini disediakan oleh Seksyen Media, Bahagian Komunikasi Korporat UPM. (Noralis Buang 'wartawan pelatih' 03-89466014).**